

OPĆINA ILIJAŠ

Općinsko vijeće

Na osnovu člana 78. Zakona o prostornom uređenju ("Službene novine Kantona Sarajevo", broj 7/05), člana 14. Zakona o privremenom korištenju javnih površina na području Kantona Sarajevo ("Službene novine Kantona Sarajevo", br. 20/04, 26/12, 32/12 i 24/15) i čl. 23. i 55. Statuta Općine Ilijaš - Prečišćeni tekst ("Službene novine Kantona Sarajevo", broj 20/09), Općinsko vijeće Ilijaš, na 38. sjednici održanoj dana 25. 02. 2016. godine, donijelo je

ODLUKU

O USVAJANJU "ELABORATA O PRIVREMENOM KORIŠTENJU JAVNIH POVRŠINA ZA POTREBE POSTAVLJANJA SLOBODNOSTOJEĆIH REKLAMNIH PANOJA NA PODRUČJU KANTONA SARAJEVO" ZA OPĆINU ILIJAŠ

I

Usvaja se "Elaborat o privremenom korištenju javnih površina za potrebe postavljanja slobodnostojećih reklamnih panoa na području Kantona Sarajevo" za Općinu Ilijaš (u daljem tekstu: Elaborat), koji je izradio Zavod za planiranje razvoja Kantona Sarajevo.

II

Elaboratom se uređuju tehnički uslovi za postavljanje reklamnih elemenata, odnos prema slobodnostojećim panoima koji nisu obuhvaćeni ovim elaboratom, tipovi plakata, te grafički prikaz mikrolokaliteta.

III

Elaborat je javni dokument, koji se nalazi kod Službe za prostorno uređenje i stambeno-komunalne poslove Općine Ilijaš.

IV

Ova odluka stupa na snagu danom objavljivanja u "Službenim novinama Kantona Sarajevo".

Broj 01/1-02-510-6/16
25. februara 2016. godine
Ilijaš

Predsjedavajući
Općinskog vijeća Ilijaš
Damir Filipović, s. r.

Na osnovu člana 6. i člana 56. Zakona o prostornom uređenju ("Službene novine Kantona Sarajevo", br. 7/05), člana 23. i 55. Statuta Općine Ilijaš ("Službene novine Kantona Sarajevo", br.

20/09), Općinsko vijeće Ilijaš, na sjednici održanoj dana 25.02.2016. godine, donijelo je

ODLUKU

O UTVRĐIVANJU PLANA PARCELACIJE GRADEVINSKOG ZEMLJIŠTA ZA IZGRADNJU APARTMANSKOG NASELJA "ALMAHA COMPANY" U MJESTU NIŠIĆI

Član 1.

Ovom Odlukom utvrđuje se Plan parcelacije građevinskog zemljišta (Elaborat cijepanja) za izgradnju apartmanskog naselja "ALMAHA COMPANY" u mjestu Nišići.

Član 2.

Plan parcelacije naselja čini katastarska parcela k.č. br. 95/1 K.O. Ivančići na lokalitetu Nišići. Lokalitet je nepravilnog oblika, a ukupna površina obuhvata iznosi 10.124,00 m².

Apartmansko naselje "ALMAHA COMPANY" u mjestu Nišići se sastoji od ukupno 7 parcela prosječne površine cca 1.440 m² od čega je 6 građevinskih parcela, jedna (1) parcela planirana za izgradnju infrastrukture unutar naselja (saobraćajnica, vodovod i kanalizacija) i za uređenje zelenih površina sa pratećim sadržajima, a definisan je na sljedeći način:

- PROSTOR NASELJA: rezidencijalno-rekreativnog karaktera na kojima je planirana izgradnja 6 individualnih objekata riješenih u nekoliko tipova savremenog dizajna eksterijera i enterijera, čije su površine 130-200 m², maksimalne spratnosti P+S,
 - ZONA ZELENIH I REKREATIVNIH POVRŠINA: planirana u okviru planiranih građevinskih parcela,
- SAOBRAĆAJNICE: širine profila kolske saobraćajnice P 4,0-5,0 m sa jednostranim i dvostranim trotoarima širine 1,0 m.

Član 3.

Sastavni dio ove Odluke je Grafički prilog Elaborat cijepanja, ažurna geodetska situacija-parcelizacija.

Član 4.

Ova Odluka stupa na snagu danom objavljivanja u "Službenim novinama Kantona Sarajevo".

Broj 01/1-02-510-7/16
25. februara 2016. godine
Ilijaš

Predsjedavajući
Općinskog vijeća
Damir Filipović, s. r.

